

## Kristo Anatukuzwa Ndani ya Watu Wake

*Hayo nimewaambieni mpate kuwa na amani ndani yangu. Ulimwenguni mnayo dhiki; lakini jipeni moyo; mimi nimeushinda ulimwengu—Yohana 16:33.*

**K**risto hakushindwa wala kukata tamaa, na wafuasi Wake wanapaswa kudhihirisha imani stahimilifu kama yake. Wanapaswa kuishi kama Alivyoishi na kufanya kazi kama Alivyofanya, kwa sababu wanamtegemea Yeye kama Mtendaji Mkuu. Ujasiri, nguvu na ustahimilivu ni lazima wawe navyo. Ingawa magumu yataleta vikwazo njiani mwao, kwa neema Yake wanatakiwa kusonga mbele. Badala ya kulalamikia matatizo, wanatakiwa kuyashinda. Wanatakiwa wasiogope kitu na kuwa na matumaini kwa kila kitu. Kwa mnyororo wa dhahabu wa pendo Lake lisilo kifani Kristo amewafunga katika kiti cha enzi cha Mungu. Ni makusudi Yake kuwa mvuto wa juu kabisa ulimwenguni, unaotokea katika chanzo cha nguvu zote uwe wao. Wanatakiwa kuwa na nguvu za kuushinda uovu, nguvu ambayo si dunia wala kifo wala kuzimu vinaweza kuishinda, nguvu itakayowawezesha wao kushinda kama Yesu alivyoshinda.

Kristo alikusudia kuwa utaratibu huo wa mbinguni, mpango wa serikali ya mbinguni na ushirikiano wa Uungu mbinguni vionekane katika kanisa Lake hapa duniani. Hivyo basi kupitia watu Wake apokee utukufu mwingi. Kupitia kwao jua la haki litang'aa ulimwenguni katika fahari isiyoffia. Kristo ametoa nyenzo za kutosha kwa ajili ya kanisa Lake ili kwamba aweze kupokea matokeo makubwa ya utukufu kutoka kwa watu Wake aliowanunua na kuwakomboa. Amewakirimia watu Wake uwezo na baraka ili waweze kuwakilisha utoshelevu Wake. Kanisa lililokirimiwa haki ya Kristo, ndilo ghala Yake ambapo utajiri wa rehema Yake, neema Yake na upendo Wake vitaonekana kikamilifu katika onesho la mwisho. Kristo huwaangalia watu Wake katika usafi na ukamilifu wao kama tunu ya kuteswa Kwake na utimilizwaji wa utukufu Wake—Kristo ni kiini kikuu cha mnururisho wa utukufu wote....

Kristo alikuwa amekamilisha kazi aliyopewa kufanya. Alimtukuza Mungu duniani. Alikuwa amelidhihirisha jina la Baba. Alikuwa ameshawakusanya wale ambao wangeendeleza kazi Yake miongoni mwa wanadamu. Kisha Akasema “Nami nimetukuzwa ndani yao. Wala Mimi simo tena ulimwenguni, lakini hawa wamo ulimwenguni, Nami naja kwako. Baba Mtakatifu, kwa jina lako ulilonipa uwalinde hawa, ili wawe na umoja kama sisi tulivyo”....

Hivyo katika lugha yake aliye na mamlaka ya Mungu, Kristo aliliweka kanisa Lake teule mikononi mwa Baba. Kama kuhani mkuu Kristo alifanya upatanisho kwa ajili ya watu Wake. Kama mchungaji mwaminifu alikusanya kondoo Zake chini ya kivuli cha Mwenyezi Mungu katika kimbilio imara na la uhakika. Kwake kulibakia vita ya mwisho na Shetani, Naye Alitoka kwenda kukabiliana nayoyote (Tumaini la Vizazi Vyote, sura ya 73).